

摘藻堂四庫全書薈要

經部

欽定四庫全書會要

經部

日講禮記解義卷二十八

詳校官編修臣程嘉謨




欽定四庫全書薈要卷二千三百二十六

經部

日講禮記解義卷二十八

郊特牲


此篇皆記祭事中雜冠昏兩段曰郊特牲者以篇首
三字名篇也陸氏曰郊者祭天之名用一牛故曰特
牲

郊特牲而社稷大牢天子適諸侯諸侯膳用犢諸侯適
天子天子賜之禮大牢貴誠之義也故天子牲孕弗食

也祭帝弗用也

此言特牲之用禮貴其誠之義也犢小牛卽特牲也
禮莫重於祭其次莫重於享惟郊用特牲而社稷則
以大牢惟天子適諸侯諸侯進膳用犢而諸侯適天
子天子有賜亦以大牢蓋犢牲未有牝牡之情貴其
誠慤是以致敬者用之若孕則其誠已散而天子弗
食故不以膳也祭帝弗用故不以郊也方氏慤曰天
子有天地之德故諸侯以事天地者事天子諸侯有

社稷之功故天子以禮社稷者禮諸侯

大路繁纓一就先路三就次路五就郊血大饗腥三獻
燂一獻孰至敬不饗味而貴氣臭也諸侯為賓灌用鬱
鬯灌用臭也大饗尚腍脩而已矣

此言尚質貴氣之事也臭亦氣也脯加薑桂曰腍脩
至敬無文故大路為祭天之車繁纓一就貴質素也
下而先路三就次路五就則其飾彌文矣祭禮惟郊
尚血下而大饗則腥三獻則燂一獻則孰敬之至者

不饗味而貴氣臭也蓋血則氣全腥亦近之故用於
所尊孰則味全燭亦近之故用於所卑推此而言如
諸侯來朝為賓三獻畢王使宗伯酌圭瓚以灌之但
用鬱鬯之酒是亦貴氣臭之義也若天子饗諸侯雖
設大牢之盛饌而必先設胾脩於筵前即所尚可知
矣按大饗尚胾脩謂王饗諸侯與上大饗不同而不
饗味則一也

大饗君三重席而酢焉三獻之介君專席而酢焉此降

尊以就卑也

此言主君受酢之義也。饗謂諸侯相饗，君主國之諸侯也。酢，主君受賓客之酢爵也。三獻，饗卿之禮，故謂卿為三獻介大夫也。專，單也。諸侯之席三重，如鄰國諸侯來朝而主君饗之，是曰大饗，則設三重之席而受酢爵。以兩君敵體，無所增損也。若諸侯遣卿來聘而大夫為上介，則專席矣。大夫席應再重，今以為介降一等。主君席應三重，今以受介之酢，故亦撤去兩

重是降諸侯之尊以就大夫之卑禮所謂曲而殺者此也

饗禘有樂而食嘗無樂陰陽之義也凡飲養陽氣也凡食養陰氣也故春禘而秋嘗春饗孤子秋食耆老其義一也而食嘗無樂飲養陽氣也故有樂食養陰氣也故無聲凡聲陽也

此言因時行禮有樂無樂之義也饗謂春饗孤子禘謂春祭宗廟食謂秋養耆老嘗謂秋祭宗廟饗與禘

之禮行於春者皆有樂食與嘗之禮行於秋者皆無
樂此陰陽之義也凡飲用水漿酒醴其性虛而清所
以養陽氣也凡食用黍稷稻粱其性實而濁所以養
陰氣也故春禘秋嘗同一追養春饗秋食同一報功
而食與嘗無樂者豈獨薄之哉蓋饗禘主於飲飲養
陽氣義在宣暢故有樂食嘗主於食食養陰氣義在
凝寂故無聲凡樂之聲乃陽之屬而陰之反所以獨
宜於饗禘也按禘注謂禘字之誤疏因指為夏殷之

禮而無確據伏氏趙氏謂如字者得之張子曰禘於夏周為春夏嘗於夏周為秋冬作記者文舉以二氣對互而言耳

鼎俎奇而籩豆偶陰陽之義也籩豆之實水土之品也不敢用褻味而貴多品所以交於旦明之義也

此言祭之陳器與實器各有其義也鼎俎所以盛犧牲籩豆所以盛果實鼎有用十與十二者然十鼎則陪鼎三正鼎七十二鼎則陪鼎三正鼎九其數仍奇

也旦當為神陰陽之義非特有樂無樂而已鼎自一
以至九其數皆奇而俎亦如之豆自六以至二十六
其數皆偶而籩亦如之蓋鼎俎之實以動物而男子
薦之故其數奇籩豆之實以植物而婦人薦之故其
數偶此亦陰陽之義也又籩之實若菱芡豆之實若
芹蒲之類是為水品籩之實若棗栗豆之實若菁韭
之類是為土品所以不敢用常物而貴多品者此致
敬以交於神明之義也按不敢字貫褻味與多品言

之禮器云薦不美多品亦貴誠之義也

賓入大門而奏肆夏示易以敬也卒爵而樂闋孔子屢歎之奠酬而工升歌發德也歌者在上匏竹在下貴人聲也樂由陽來者也禮由陰作者也陰陽和而萬物得此言兩君燕饗之禮樂也賓鄰國之諸侯大門有二燕則寢門饗則廟門也卒爵飲盡爵也兩君相朝而行燕饗之禮當賓入大門奏肆夏之詩以延進之夫樂主和而肆夏之詞嚴是示和易之中有嚴敬之節

也主人獻賓而樂作賓飲卒爵而樂止賓酢主人而樂作主人卒爵而樂止蓋盈而能反反則為文孔子所以屢歎美之也主人復酬賓而奠此酬爵則樂工升堂而歌所以發揚賓主之德也工歌在堂上匏竹在堂下是貴人聲也蓋禮樂始於聖人而原於天地樂由陽來一天地之和也禮由陰作一天地之序也惟天地合而萬物生斯陰陽和而萬物得禮樂之行於賓主而為聖人所嘉美也厥有由然矣周氏諤曰

禮樂之始雖由於陰陽及其妙也則能統陰陽育萬物故周官曰禮樂合天地之化百物之產其此之謂乎

旅幣無方所以別土地之宜而節遠邇之期也龜為前列先知也以鐘次之以和居參之也虎豹之皮示服猛也束帛加璧往德也

此言天子之待諸侯有制貢之法與陳貢之義也旅陳也無方非一方所貢也鐘即金也金以材言鐘以

器言王者撫有天下莫非王土王臣凡庭實所陳有不止一方而已者以土地各有其宜故別而取之來各有遠邇故節而致之也旅幣而以龜為前列以其能先知也以鐘為次者所以發人情之和故參居庭實之間也有虎豹之皮以示服猛也以玉加於束帛之上玉以表德是往歸於有德也陳氏祥道曰周官六服其見有六歲之差其交有六物之異六物之異者所謂別土地之宜六歲之差者所謂節遠近之期

也

庭燎之百由齊桓公始也大夫之奏肆夏也由趙文子始也

此言諸侯大夫失禮之始也庭燎庭中所設之炬以照來朝之臣夜入者禮之失也必有所由始如庭燎之百是為天子之禮而諸侯僭之則由齊桓公始也又大射公升即席奏肆夏燕則賓及庭亦奏肆夏是為諸侯之禮而大夫僭之則由趙文子始也夫禮教

之設所以立天下之大防齊桓趙武當時皆有賢名
而其僭若此蓋周室之衰久矣

朝覲大夫之私覲非禮也大夫執圭而使所以申信也
不敢私覲所以致敬也而庭實私覲何為乎諸侯之庭
為人臣者無外交不敢貳君也大夫而饗君非禮也大
夫強而君殺之義也由三桓始也

此又言大夫失禮之始也諸侯世相朝無覲禮此言
覲者因朝而及之也私覲以私禮見也使聘使也皮

幣輿馬皆陳於庭故曰庭實三桓魯桓公之子慶父叔牙季友之後也凡國君朝覲於鄰國大夫從焉而或行私覲則非禮也大夫執圭而專使事當私覲以申己之信今從君而不敢私覲者所以致敬於君也而庭實私覲何為乎諸侯之庭哉為人臣者無外國之交不敢有貳心於君焉故也禮別嫌疑蓋莫嚴於大夫矣若大夫具饗以召君則非禮也大夫強橫而君殺之者義也義不足以制大夫之強而大夫乃疑

於君矣是由魯之三桓始也案此言大夫失禮之始於三桓蓋兼承私覲饗君而言也鄭氏謂殺大夫由三桓始則季友未嘗見殺又春秋之初殺大夫者不始三桓也黃氏以殺為降殺之義尤非矣

天子無客禮莫敢為主焉君適其臣升自阼階不敢有其室也覲禮天子不下堂而見諸侯下堂而見諸侯天子之失禮也由夷王以下

此又言諸侯失禮之始也夷王名燬天子無為客之

禮以其尊無對莫敢為之主故也若適其臣則升自
阼階以臣之不敢私有其室也秋行覲禮專於辨分
天子負斧依南面侯氏執玉入不下堂而見諸侯其
有下堂而見諸侯者是天子之失禮也蓋由於夷王
以下也案夷王之時去周初漸遠矣記者溯失禮之
由以見其陵夷而至於春秋者有故也

諸侯之宮縣而祭以白牡擊玉磬朱干設錫冕而舞大
武秉大路諸侯之僭禮也臺門而旅樹反坫繡黼丹朱

中衣大夫之僭禮也故天子微諸侯僭大夫強諸侯脅
於此相貴以等相覲以貨相賂以利而天下之禮亂矣
諸侯不敢祖天子大夫不敢祖諸侯而公廟之設於私
家非禮也由三桓始也

此總言諸侯大夫之僭禮也宮縣四面皆縣也錫者
干背之飾金為之大路殷祭天所乘之車也旅道也
樹屏也繡黼刺繡為斧文也丹朱染繒為赤色也繡
黼為中衣之領丹朱為中衣之緣中衣者朝服祭服

之裏衣也貨以物言利以事言禮所以辨等威昭隆
殺也如諸侯當用軒縣而今則官縣當用時王之牲
而今則用殷牲白牡當擊石磬而今則以玉雖得舞
大武但不得朱干設錫而冕服而今則用以為舞當
秉時王之車而今則秉殷之大路此皆天子之禮而諸
侯僭之也如兩旁築土為臺架屋於上而門當其中
是為臺門於路中設屏以蔽內外是為旅樹於兩楹
之間設坫而反爵其上是為反坫於朝服祭服刺染

而為褰衣之領緣是為繡黼丹朱中衣此皆諸侯之禮而大夫僭之也故天子微則諸侯僭大夫強則諸侯脅於是乎相貴以等列相覲相賂以貨利而爵不足以馭其貴祿不足以馭其富予不足以馭其幸禮之亂也甚矣夫禮之大者莫如宗廟故諸侯有國則以始封之君為祖而不敢祖天子大夫有家則以始為大夫者為祖而不敢祖諸侯若公廟而設於私家則非禮也由三桓之祖桓公始也蓋天下有道則禮

樂自天子出而諸侯莫得而僭之若無道而禮樂出於諸侯則陵夷而大夫亦僭矣案魯有文王廟而鄭亦祖厲王是諸侯而祖天子也魯既用天子之禮樂於文王周公之廟因徧用之於羣公之廟而三桓既立桓公之廟亦遂習用天子之禮樂而不自知其非此履霜堅冰易所以為至戒也

天子存二代之後猶尊賢也尊賢不過二代

此言天子所以待前代之禮也二代謂當代之前二

代凡易姓受命而為天子則天下皆統於一矣而必
存二代之後者猶尊其先世之賢而不忍臣之仁之
至也然亦不過於二代二代以前則封之而不賓又
義之盡也如周存夏殷之後於杞宋命使郊天祭其
始祖受命之王自行其正朔服色是念禹湯之德而
尊之若黃帝堯舜之後則封之以備三恪鄭氏謂遠
難法是也

諸侯不臣寓公故古者寓公不繼世

此言諸侯所以待失國者之禮也寓寄也諸侯有失國而寄處他國者謂之寓公所寓之國以其嘗為南面之君而不以為臣至寓公死而即臣其子不繼世也蓋天子為尊賢而存代以其有功德及人也若寓公失地來歸則賢不足稱矣故不臣亦所以明仁不繼世亦所以明義

君之南鄉答陽之義也臣之北面答君也大夫之臣不稽首非尊家臣以辟君也大夫有獻弗親君有賜不面

拜為君之答已也

此言君臣辨分之禮也答猶對也陽即天也君以陽明為德而南者陽之位故南鄉而有答陽之義臣以陰順為德而北者陰之位故北面以答君也諸侯於天子稽首大夫於諸侯亦稽首惟家臣於大夫獨否者非尊家臣乃所以辟君也大夫有獻則使人代往而不以身親君有賜則拜受於家而不面拜皆為君之答已故也鄭氏曰不面拜者於外告小臣小臣受

以入也小臣掌三公及孤卿之復逆復謂奏事逆謂受下奏惟大夫近於君而不敢干君而後有以全君之尊故禮以辨分尤必於大夫謹之

鄉人禡孔子朝服立于阼存室神也

此言聖人存神之事也室神先祖五祀之神惟聖人知鬼神之情狀當鄉人禡而索室以去不祥孔子則朝服立於廟之阼階蓋以存廟室之神使其依已而安也案舊注禡是強鬼之名而儼以逐之論語所謂

鄉人儻朝服而立於阼階是也禮大夫朝服以祭故用祭服以依神也

孔子曰射之以樂也何以聽何以射孔子曰士使之射不能則辭以疾縣弧之義也

此言習射之重也樂如騶虞豳首采蘋采蘩之類孔子嘗曰射之以樂為節也何以聽樂之音節而使與射容相應又何以脩射之容節而使與樂音相應甚矣禮樂交得之難也孔子又曰士未有不習於射者

若使之射而有不能則以疾為辭蓋男子始生即懸
弧於門左而有射義未可以不能謝也案懸弧之義
是解所以不可辭以不能之故疏謂疾而不能與初
生之未能相似非也

孔子曰三日齊一日用之猶恐不敬二日伐鼓何居
此言將祭失禮之事也孔子嘗曰禮有齊三日者即
不樂不弔而專其志慮猶恐於祭有不敬焉若三日
之間乃二日伐鼓則是致齊一日而已其義何所處

乎案家語季桓子將祭齊三日而二日鐘鼓之音不絕蓋其事也

孔子曰繹之於庫門內祊之於東方朝市之於西方失之矣

此亦言失禮之事也繹者祭之明日接尸又祭也祊者祭而求神也朝市朝時而市也孔子嘗曰繹之禮當在廟門外之西堂今乃於庫門內祊之禮當在廟門外之西室今乃於廟門外東方朝市當在市内近

東今乃於市内西方此三者皆失之矣案家語此為
衛莊公反國變宗廟易朝市而言

社祭土而主陰氣也君南鄉於北墉下答陰之義也日
用甲用日之始也天子大社必受霜露風雨以達天地
之氣也是故喪國之社屋之不受天陽也薄社北牖使
陰明也

此言祭社之義以及立社之制也土者五土之神山
林川澤丘陵墳衍原隰也墉墻也薄當作亳社所以

祭土而主乎陰氣也陰盛於北故設主於北牆而君
於北牆之下南鄉而祭以對答之也祭用甲日陽始
於甲而用十干之始也天子為羣姓立大社必壇而
不屋使受霜露風雨蓋風雨至則萬物生霜露降則
萬物成所以通達天地生成之氣也是故喪國之社
則屋之不使復受天陽也殷之薄社於周為喪國之
社塞其三面而開牖於北方以通陰氣陰明則物死
矣所以異於當代也案白虎通云天子諸侯各有二

社祭法王立大社王社諸侯立國社侯社是也又各有勝國之社勝國喪國也蓋人君而明乎不屋之義則知所法而下有以蕃其生明乎屋之之義則知所戒而上有以安其位矣

社所以神地之道也地載萬物天垂象取財於地取法於天是以尊天而親地也故教民美報焉家主中雷而國主社示本也唯為社事單出里唯為社田國人畢作唯社丘秉供粢盛所以報本反始也

此廣言社義也中雷亦土神二十五家為里單畫也
田獵也四邑為丘十六井也四丘為乘六十四井也
黍稷曰粢在器曰盛立社以祭所以神明乎地道也
蓋地道博厚故載萬物於下天道高明故垂日月星
辰之象於上物生而財裕象成而法顯取財於地而
資其養焉取法於天而仰其教焉是以尊天而親地
也地有同天之功如此天既有郊以報之矣於是制
為社禮以教民美善其報焉家主於中雷而國主於

社所以示有生之本也是故凡祭皆有所限唯為社
行事則里中之家無不各出一人唯為社而田則國
人皆行無留家者又唯祭社則丘乘之人未有不供
粢盛者以物生於地而報本反始禮莫隆焉故也黃
氏幹曰非天子不祭天而自天子至庶人皆得祭社
亦尊父親母之義

季春出火為焚也然後簡其車賦而歷其卒伍而君親
誓社以習軍旅左之右之坐之起之以觀其習變也而

流示之禽而鹽諸利以觀其不犯命也求服其志不貪其得故以戰則克以祭則受福

此言因社而田之事也火大火心星也建辰之月出見東方孔疏云用焚當在仲春記者以季春民始出火遂誤以天子諸侯用焚為季春也百人為卒五人為伍習變習熟其變動之節也鹽讀為艷先王因社而寓講武之法於是季春出火則君將田而先令焚除草萊也然後簡閱其車賦歷數其卒伍親誓衆於

社以習軍旅之事或驅而左或驅而右或息鐸而坐
或振鐸而起於以觀其習變之生熟焉此講武以法
也由是而田則驅禽於陳前使之流動示士卒而艷
之以利欲其不見利而趨至於犯命而失伍蓋以求
服士卒之志而不貪其所得之禽此獲牲以禮也夫
如是故以戰則克以祭則受福一舉而兩者皆得也
案周禮司燿季春出火季秋內火如書言寅賓出日
寅饒納日也因出火而為焚亦贊化育之一事鄭氏

曰凡田大獸公之小禽私之失伍而獲猶為犯命此
兵法所以貴節制也

天子適四方先柴

此言巡狩告天之禮也柴燔柴也天子十二年一巡
狩適四方諸侯之國至於方嶽必先燔柴以告至於
天者禮也

郊之祭也迎長日之至也大報天而主日也兆於南郊
就陽位也掃地而祭於其質也器用陶匏以象天地之

性也於郊故謂之郊牲用騂尚赤也用犢貴誠也

此言冬至祭天之禮各有其義也兆園丘之方域也
先王祭天於郊必用夏正建子之月冬至之日者所
以迎長日之將至也日為陽宗冬至一陽生則天地
生物之心可見故郊之為祭所以大報天而必主乎
日也為園丘於南郊者南為陽位故就而報之也既
燔柴於壇上必掃壇下之地而行正祭不設莞簟者
至敬無文於其地之質也玄酒之尊以陶酌玄酒以

獻則以匏者陶匏皆物性之本然所以象天地本然之性也夫既曰圓丘曰泰壇又謂之郊者以兆在南郊故也牲必用騂周尚赤也用犢貴其誠慤也張子曰天道本簡易天子之禮亦當簡易繁文虛費帝亦不享

郊之用辛也周之始郊日以至

此言郊用辛日之義也郊之用辛何也周之始郊冬至恰遇辛日自此以後遂用至後之辛日也此似是

言魯郊用辛之指左氏傳所謂魯將以十月上辛有事於上帝是也考之周書武王克商庚戌柴望非辛日也或謂始郊對建寅之月又祈穀郊祭而言亦未確

卜郊受命於祖廟作龜於禰宮尊祖親考之義也卜之日王立於澤親聽誓命受教諫之義也獻命庫門之內戒百官也大廟之命戒百姓也

此言卜郊命衆之義也作灼也禰宮禰廟也澤澤宮

也於其中以射擇士而助祭謂之澤宮將郊而卜必請命於祖廟而用龜於禰宮祖遠而尊禰近而親此尊祖親考之義也其日卜竟選士於澤宮有司將以祭事戒命衆執事而王親臨聽受之是受教諫之義也於是有司獻命於庫門之內以戒百官而大廟之命則所以戒族姓也案卜郊陳注以為卜牲程子曰春秋有卜郊上辛不吉則卜中辛中辛不吉則卜下辛蓋亦魯禮也

祭之日王皮弁以聽祭報示民嚴上也喪者不哭不敢
凶服汜掃反道鄉為田燭弗命而民聽上

此言郊日致嚴之事也報猶白也汜掃灑水而後掃
也反道刻令新土在上鄉郊內六鄉也郊日之朝有
司告時告備於王王必服皮弁以聽之者所以尊天
而示民嚴敬其君上也及旦而有喪者不哭凶服者
不敢出於經行之處汜掃以去其塵反道以新其土
鄉更於田首設燭以照路此皆不待上令民自聽從

則以化王嚴上故也

祭之日王被袞以象天戴冕璪十有二旒則天數也乘素車貴其質也旂十有二旒龍章而設日月以象天也天垂象聖人則之郊所以明天道也

此言郊祭儀文之合乎天道也璪即藻也當祭之日王以祭服易朝服於是內服大裘外被龍袞袞衣有日月星辰之章是象天之文也首戴冕其璪前後各十二旒以天有十二月是法天之數也所乘為木路

樸素渾堅貴其質也所建之旂常亦各十有二旒而
旂畫交龍之章常畫日月之象皆所以象天也天垂
象於上而聖人則之是故郊所以報天而即所以明
天道也案社所以神地之道而郊所以明天道王者
事天明事地察此其是矣

帝牛不吉以為稷牛帝牛必在滌三月稷牛唯具所以
別事天神與人鬼也萬物本乎天人本乎祖此所以配
上帝也郊之祭也大報本反始也

此申言郊禮之重也祭上帝者謂之帝牛祭后稷者

謂之稷牛不吉謂卜不吉或有死傷為猶用也滌者

牢中清除之所周之郊禮祀后稷以配天三月之前

使充人養二牛以為牲至期卜吉而用之若帝牛不

吉則易稷牛以用而別選稷牛蓋帝牛必在滌三月

者而後可稷牛則具而足矣帝為天神遠而尊稷為

人鬼近而親故事之有不同而其所以必配以后稷

者萬物本乎天是天即物之祖也人本乎祖是祖即

人之天也祭天而以祖配之所以大報本之禮而反其所自始也案郊以配天亦稱上帝者互文也朱子曰周文武之功起於后稷故郊祀后稷以配天宗祀文王於明堂以配上帝帝即是天却分祭何也為壇而祭故謂之天祭於屋內以神祀之故謂之帝也

日講禮記解義卷二十八

欽定四庫全書養要卷二千三百二十七

經部

日講禮記解義卷二十九

郊特牲

天子大蜡八伊耆氏始為蜡蜡也者索也歲十二月合聚萬物而索饗之也

此言蜡祭之名義也伊耆氏鄭注謂古天子號疏謂神農或云帝堯十二月謂夏正建丑之月天子大蜡其神有八蓋自古伊耆氏始為蜡蜡乃索求其神之

義也歲十二月為閉藏之候合聚萬物而物無不成
故於此報其神之有功者而索饗之也案八蜡徐氏
據經文謂先嗇一司嗇二百種三農四郵表畷五貓
虎六坊七水庸八當以為正孔疏去百種而增昆蟲
方氏亦去百種而分貓虎為二皆未確陳用之據周
禮謂伊耆氏與壺涿氏銜枚氏為一例非古天子之
號當是佐天子者疑未能明也

蜡之祭也主先嗇而祭司嗇也祭百種以報嗇也饗農

及郵表畷禽獸仁之至義之盡也古之君子使之必報之迎貓為其食田鼠也迎虎為其食田豕也迎而祭之也祭坊與水庸事也

此分言致祭八神之義也嗇穡同先嗇神農司嗇古后稷官百種謂百穀之種之神農古之田畯也郵表畷謂標表田畔相連畷處造為郵舍田畯居之以督畊者禽獸即貓虎迎迎其神也坊隄也水庸溝也事謂農事嗇事始於神農司於后稷故蜡祭以先嗇為

主配以司嗇而更祭百穀之種蓋嗇非人不成非種
不生故竝以報其樹藝之功也因農官勞於農事祭
及於所居之郵表畷而并下及於禽獸者此仁之至
義之盡也古君子之於民物使之必有以報之祭而
迎貓為其能食田鼠迎虎為其能食田豕皆有功於
農是以迎其神而祭之也祭坊與水庸者以坊能蓄
水障水庸能受水洩水亦皆有功於農事故也

曰土反其宅水歸其壑昆虫無作草木歸其澤

此言蜡祭之祝辭也昆蟲蝻蝗之屬蜡之祝辭有曰
凡所以祈於神者土則反其宅而無崩圯水則歸其壑
而無汎溢昆蟲無作而為災草木歸生於藪澤而無
妨我稼穡案蔡氏邕本更有豐年若土歲取千百二句
皮弁素服而祭素服以送終也葛帶榛杖喪殺也蜡之
祭仁之至義之盡也黃衣黃冠而祭息田夫也野夫黃
冠黃冠草服也

此言蜡臘異服之義也皮弁素服皆白色弁亦服爾

故下但言素服野夫即田夫當其蜡皮弁素服而祭以歲功既成物至此則老而終矣故素服以送之也帶不以麻而以葛杖不以竹而以榛較之喪禮為殺也蜡之為祭以報功則徧物而無遺以行禮則徧物而不失此仁之至義之盡也既蜡遂服黃衣黃冠而臘先祖五祀者所以勞農而休息之也野夫皆黃冠黃冠乃草野之服也案孔氏疏蜡與臘對言之則有別總言之皆蜡也祭服所以異者方氏慤曰蜡以息

老物故服送終之服臘以息民故服田夫之服

大羅氏天子之掌鳥獸者也諸侯貢屬焉草笠而至尊
野服也羅氏致鹿與女而詔客告也以戒諸侯曰好田
好女者亡其國天子樹瓜華不斂藏之種也

此言因蜡而訓戒諸侯也大羅氏官名瓜華謂瓜與
果蓏之屬大羅氏者天子之掌鳥獸者也諸侯鳥獸
之貢皆屬焉使者戴草笠而至尊野服以告歲功也
羅氏受貢畢使者辭歸則致鹿與女而詔之使客歸

而告戒其君曰好田好女者亡其國恐諸侯或有禽
荒色荒也又使歸告其君曰天子所樹植者惟是瓜
及果蓏取供時用而已若可收斂而藏之種不與焉
恐諸侯或與民爭利也此皆因蜡而及之所以示天
下息事寧人者至矣案孔氏疏鹿是田獵所得女是
亡國所俘非每國輒與女鹿羅氏以示使者爾

八蜡以記四方四方年不順成八蜡不通以謹民財也
順成之方其蜡乃通以移民也既蜡而收民息已故既

蜡君子不興功

此言侯國之蜡也順謂五氣時若成謂九穀皆登移之言羨也八蜡之禮通行於侯國先王即以記四方之豐凶焉若其國歲凶則廢蜡禮不得與諸方通祭所以謹節民財也歲豐則蜡禮舉行所以寬縱民力而使為樂也夫蜡為合聚之祭故既蜡而民亦息已君子不興農功而使更執其勞也案蜡以息田夫故既蜡而民因以息方氏慤曰此所謂功止謂農功爾

若夫宮功執於建亥之月土功畢於建子之月武功
續於建丑之月皆不以既蜡而廢也

恒豆之菹水草之和氣也其醢陸產之物也加豆陸產
也其醢水物也籩豆之薦水土之品也不敢用常褻味
而貴多品所以交於神明之義也非食味之道也

此推言祭品之義而見其貴於誠也菹酢菜醢肉醬
也祭以備物為敬如所常進朝事饋食之豆其所用
菹則取乎水草和美之氣也其所用醢則陸地所產

之物也若祭末醕尸有加於常進之豆其所用菹亦陸產也其所用醢則水物也凡籩豆之薦皆為水土之品不敢用常食之褻味而貴多品者以交接神明之義在乎恭敬質素而非徒食味之道也案周禮醢人掌四豆之實薦腥時薦朝事之豆八薦熟時薦饋食之豆八醕尸時薦加豆八羞豆二舊說故以恆豆為薦腥薦熟時之豆加豆為醕尸時之豆也但此所稱豆實水陸與醢人所掌不盡合蓋約舉之辭抑或

為異代之制與

先王之薦可食也而不可耆也卷冕路車可陳也而不可好也武壯而不可樂也宗廟之威而不可安也宗廟之器可用也而不可便其利也所以交於神明者不可以同於所安樂之義也

此承上意而廣言之也卷冕龍衮也路車木車也武大武也惟祭非食味之道是以先王之所薦雖可食而不可供耆欲也如卷冕路車雖可陳而不可資玩

好也武舞為勇壯之容而不可娛樂也宗廟為威嚴之地而不可安適也祭器可用以盛物而不可便其私利也此皆所以交於神明之義故與凡所安樂者異也

酒醴之美玄酒明水之尚貴五味之本也黼黻文繡之美疏布之尚反女功之始也莞簟之安而蒲越豪毳之尚明之也大羹不和貴其質也大圭不琢美其質也丹漆雕幾之美素車之乘尊其樸也貴其質而已矣所以

交於神明者不可同於所安褻之甚也如是而后宜

此又承上意而詳言之也玄酒水也明水陰鑒取於月之水疏布冪也蒲越豪鞞藉神席也雕刻鏤也幾漆飾之畿限也餘竝見禮器祭祀之物如酒醴美矣而必玄酒明水之尚以水最在先貴五味之本也黼黻文繡美矣而必疏布之尚以疏布最在先反女功之始也莞簟安矣而必蒲越豪鞞之尚所以神明之也大羹不和是貴其質也大圭素而不琢是美其質

也車有丹漆雕幾美矣而必素車之乘是尊其樸也
此皆貴其質而已矣以其交於神明不可同於所安
褻之甚有必如是而後稱者故不用彼而用此也方
氏慤曰前云不可同於所安樂之義此云不可同於
所安褻之甚樂猶有義焉褻則甚矣

鼎俎奇而籩豆偶陰陽之義也黃目鬱氣之上尊也黃
者中也目者氣之清明者也言酌於中而清明於外也
此言祭用黃彝之義也黃目周禮名黃彝以黃金鏤

其外為目因名也鬱氣謂鬱鬱芬芳之氣祭之鼎俎
奇而籩豆偶陰陽之義也所列之尊獨用黃目而為
酌鬱鬱酒之上尊者以黃者中央之色目者氣之清
明言鬱鬱之酒酌於中而清明之氣達於外猶祭者
之精誠積於中而禮文明於外也案六彝之次為虎
彝雉彝鷄彝鳥彝斚彝黃彝黃彝在末而言上尊者
鄭氏以為於諸侯為上陸氏佃以為尊先大彝先小
也

祭天掃地而祭焉於其質而已矣醯醢之美而煎鹽之
尚貴天產也割刀之用而鸞刀之貴貴其義也聲和而
後斷也

此申言祭物貴質之意也鸞刀見禮器祭天之禮於
壇兆之內掃地而祭焉取其質而已矣所陳之品醯
醢非不美也而惟煎鹽之尚以鹽雖由煎煉而成然
此醢醢則人功為少是貴天產也至於宗廟割牲以
割刀為用而鸞刀為貴蓋貴其聲和之義惟鸞鈴之

聲調和而後用以割斷也陳氏祥道曰和非斷則牽
斷非和則刺故天以秋肅物而和之以兌聖人以義
制物而和之以仁鸞刀以和濟割亦此意也

冠義始冠之緇布之冠也大古冠布齊則緇之其緇也
孔子曰吾未之聞也冠而敝之可也

此章總明冠義而先言始冠之制也綏纓之垂下者
冠禮必有義始冠之時先加以緇布之冠此即大古
之齊冠也大古常冠惟用白布至祭而致齊則緇之

以幽思也後王重古故始加用此但古制初未有垂下之綏其有綏者孔子嘗曰吾未之聞則後世之失也既冠而後敝棄之可也鄭注云三代改制齊冠不復用以白布冠質以為喪冠案玉藻緇布冠纁綏皇氏謂諸侯位尊故畫飾於理或然然亦起於後世也適子冠於阼以著代也醺於客位加有成也三加彌尊喻其志也冠而字之敬其名也

此言冠適子之義也酌而無酬酢曰醺客位在戶牖

之間南面適子之冠必於阼階在東序少北而近主位者父老而傳則適子為主所以著明代父之義也醺必於客位待之如賓加禮於有成之人也始加緇布冠再加皮弁三加爵弁以漸而彌尊所以曉喻之使充廣志意以稱彌尊之服也冠畢而賓字之以既成人故敬其名而不稱也案孔疏庶子冠於房戶外南面夏殷醺用酒每一加則一醺周用醴三加畢乃一醺於客位也朱子曰不醴而醺乃當時國俗不同

有如此如魯衛之幕有縹布祔有離合皆周禮自不同未必夏殷法也

委貌周道也章甫殷道也毋追夏后氏之道也周弁殷
冏夏收三王共皮弁素積

此釋言三代三加之冠也委安也章明也毋發聲之
辭追猶推也弁謂爵弁弁言大也冏覆也收斂也皮
弁以白鹿皮為之素白色積辟積謂疊幅也冠服不
可不辨如始加之緇布冠其曰委貌者乃周之道言

所以安正容貌也曰章甫者乃殷之道言所以表正
丈夫也曰毋追者乃夏后氏之道言似其椎樸之形
制也三加之爵弁周則曰弁弁名出於槃是光大之
義也殷則曰冔冔名出於幠是覆飾之義也夏則曰
收收名取於斂髮是斂藏之義也三代之不相襲者
如此至為再加之冠服冠則共用皮弁服則共用素
布而辟積其要中以為裳此則三王不異也周氏謂
曰委貌章甫冔收命以意毋追與弁命以形三代不

同者所以趨時三代共之者所以立本也蓋皮弁素積上古之服

無大夫冠禮而有其昏禮古者五十而后爵何大夫冠禮之有諸侯之有冠禮夏之末造也天子之元子士也天下無生而貴者也繼世以立諸侯象賢也以官爵人德之殺也死而謚今也古者生無爵死無謚

此言大夫諸侯天子無冠禮之義也末造猶言末世元子適長子也人生二十而冠乃無大夫冠禮而止

有其昏禮者何也古者五十服官政然後爵之為大
夫當其冠時猶是士也而何大夫冠禮之有不惟大
夫諸侯亦無冠禮其有冠禮者夏之末造所為非先
王之舊也又豈惟諸侯雖天子之元子亦無冠禮蓋
元子亦士也天下無生而即貴者必有德而後有位
故其冠亦但用士禮也天子之元子既然即諸侯之
世子可知繼世而立為諸侯以其能法前人之賢也
不賢則不得立故其冠亦用士禮也諸侯之世子既

然即大夫之適子可知古以官爵人有上大夫中大夫下大夫之差皆視其德之大小而為隆殺故士之死而有諡乃今世之失禮也古者生無大夫之爵則死不得為諡蓋諡視乎爵而爵視乎德方冠而德猶未成所以亦用士禮也案家語孔子曰公四加玄冕王肅注天子五加衮冕大戴禮天子諸侯皆四加朱子則謂當是諸侯三加玄冕天子三加衮冕孔疏云天子諸侯十二而冠據左氏傳一星終之說他無所

考

禮之所尊尊其義也失其義陳其數祝史之事也故其數可陳也其義難知也知其義而敬守之天子之所以治天下也

此因冠禮而推言之以明禮以義為重也先王制禮有本有文禮之所以尊者尊其義也若失其義而但陳玉帛俎豆厚薄之數是祝史之事也故其數之在外者可陳也其義之在內者難知也如能知其義而

敬守之則推已及物即天子之所以治天下也朱子
曰此蓋秦火以前典籍備具之時之語然非得其數
則其義亦不可得而知矣況今亡逸之餘數之存者
不能什一尤不可以為祝史之事而忽之也案朱子
此言與論易理必根於象數相似皆極至之論

天地合而后萬物興焉夫昏禮萬世之始也取於異姓
所以附遠厚別也幣必誠辭無不腆告之以直信信事
人也信婦德也壹與之齊終身不改故夫死不嫁

此章總明昏禮而先言取異姓及幣辭之義也附託
厚重腆善也禮之重昏姻也觀於天氣下降地氣上
行兩者合而後萬物興則夫婦之道可知已有夫婦
然後有父子是昏禮乃萬世之始也其取必於異姓
所以附於遠嫌而厚其有別也用幣必誠致辭不言
不腆而惟示之以直信信所以事人而為婦德也始
昏之時共牢而食壹與之同其尊卑則終身從之不
可復改而他適矣故夫死不嫁此直信之義也蓋婦

人以身事人者也事人必以信故體信以為德而後
可以事人詩曰婦有長舌維厲之階言無信也易曰
婦人貞吉從一而終言不改也

男子親迎男先於女剛柔之義也天先乎地君先乎臣
其義一也執摯以相見敬章別也男女有別然後父子
親父子親然後義生義生然後禮作禮作然後萬物安
無別無義禽獸之道也

此言親迎奠鴈之義也先者倡導之也昏禮之重而

男子必親迎焉者是男倡於女男陽剛以倡為義女陰柔以從為義也推之天知始而地代終之君出令而臣致行之其為剛柔之義一也必奠鴈以為摯者以敬明別而不敢褻也男女有別然後倫理明恩義篤而父子以親父子親則親疏上下各得其宜而義生義生則經曲隆殺皆有節文而禮作禮作則分定情和而萬物安矣若無別無義是禽獸之道也而豈所以為禮乎案易之義以陽先陰不以陰先陽是故

男下女而為咸女感男而為蠱推之泰否損益莫不
皆然記禮者此言可謂見其大矣

壻親御授綏親之也親之也者親之也敬而親之先王
之所以得天下也出乎大門而先男帥女女從男夫婦
之義由此始也婦人從人者也幼從父兄嫁從夫夫死
從子夫也者夫也夫也者以知帥人者也

此言親御授綏及男先女後之義也大門女家之門
夫婦之道敬以明別而亦親以明愛故親迎之後婦

升車壻親御而授以綏者躬親之也必躬親之者乃
所以致其親愛之意也既敬而又親之則仁義兩盡
即先王之所以得天下也出乎大門而壻車在先是
男帥女女從男夫婦倡隨之義實由此始蓋婦人以
順為正從人者也是以有從父兄從夫從子三從之
義而夫也者何也所以明乎丈夫之道也丈夫也者
謂其能才知帥人者也則先後之序其不容紊也
決矣

玄冕齊戒鬼神陰陽也將以爲社稷主爲先祖後而可不致敬乎

此言玄冕齊戒之義也陰陽謂夫婦昏禮之行必玄冕親迎而且先致其齊戒夫玄冕齊戒乃事鬼神之道也而施之陰陽之配者蓋以主婦助社稷之祭傳世爲先祖之後其義甚重而不可以不致敬也案孔疏士昏禮用爵弁是士服之上者則天子以下皆用上服以五冕色俱玄故總稱玄冕

共牢而食同尊卑也故婦人無爵從夫之爵坐以夫之
齒器用陶匏尚禮然也三王作牢用陶匏厥明婦盥饋
舅姑卒食婦餽餘私之也舅姑降自西階婦降自阼階
授之室也昏禮不用樂幽陰之義也樂陽氣也昏禮不
賀人之序也

此歷舉昏禮而釋其義也牢俎也盥饋盥潔而饋食
也私恩也昏禮之成夫與婦共牢而食一牲者以與
夫齊體同其尊卑也故婦人無爵惟從夫之爵其坐

則以夫之齒盛酒酌酒器用陶匏者貴尚古禮之自然也大古無共牢之禮三王作之而仍用陶匏重夫婦之始也昏之明日婦盥而饋特豚於舅姑舅姑食畢而賜婦餽餘以其來而嗣我宗祀故賜之食以致親愛之意也舅姑降自賓階婦降自主人之階示授之室而為主也昏禮不用樂者以思嗣親於幽陰而感傷也樂為陽氣故不用也昏禮不稱賀者子以代父婦以代姑乃相承之序而有所不忍也陳氏祥道

曰周官大司徒以陰禮教親則民不怨昏禮其陰禮與

有虞氏之祭也尚用氣血腥燭祭用氣也殷人尚聲臭味未成滌蕩其聲樂三闋然後出迎牲聲音之號所以詔告於天地之間也周人尚臭灌用鬯臭鬱合鬯臭陰達於淵泉灌以圭璋用玉氣也既灌然後迎牲致陰氣也蕭合黍稷臭陽達於牆屋故既奠然後炤蕭合羶鄉凡祭慎諸此

此言歷代祭禮之所尚也滌蕩宣播之意臭者氣之
總名灌灌地以降神也鬯秬黍酒也鬱香草也合和
也蕭香蒿也煇燒也羶當為馨香即黍稷也天子諸
侯廟祭之禮代有異尚而誠敬則同如有虞氏之祭
也尚用氣初以血詔神於室次薦腥若燂於堂皆未
熟而用氣也殷人之祭則尚聲當臭味之未成必先
宣播其音樂之聲及三闋然後出廟門外而迎牲蓋
鬼神陰陽同一合散聲之號呼所以詔告於天地之

間庶幾聞之而來格來饗也周人之祭則尚臭故灌地以鬯臭必先擣鬱汁以合鬯是用臭氣求陰而下達於淵泉也其酌灌以瓚而瓚以圭璋為柄是又用玉潔潤之氣也既灌而後迎牲所以致陰氣也以蕭染脂合黍稷而燒之是用臭氣求陽而上達於墻屋也故既奠灌爵以依神然後炳蕭而合羶香凡祭未有不慎於此者陸氏佃曰味口事也氣目事也聲耳事也臭鼻事也

魂氣歸於天形魄歸于地故祭求諸陰陽之義也殷人
先求諸陽周人先求諸陰詔祝於室坐尸於堂用牲於
庭升首於室直祭祀于主索祭祀于祊不知神之所在
於彼乎於此乎或諸遠人乎祭于祊尚曰求諸遠者與
此申言求神之義也直祭正祭也主神主也祊有二
一於正祭之後又祭於廟門內一於祭之明日又祭
於廟門外也彼此指室堂而言人之生也受氣於天
受形於地故死則魂氣歸於天形魄歸於地祭也者

求魂魄於陰陽之義也惟殷人先求諸陽故迎牲而先作樂惟周人先求諸陰故先灌而後迎牲至於所以求之則有不止於一處而已者當朝事之時祝取牲脾腎燎於爐炭而入以告神是詔祝於室也灌鬯以後尸坐戶西南面是坐尸於堂也於是乎納牲而殺之於庭而制祭之後升牲首於室薦熟而為正祭則祝於神主至祭之日以及明日而索祭又求於廟門者以不知神之所在或於彼乎或於此乎或諸遠

於人乎祭於祊則庶幾曰求諸遠者與案詔祝於室
時灌事畢而朝事始矣祭以孰為正則血腥之屬盡
敬心焉爾

祊之為言倮也所之為言敬也富也者福也首也者直
也相饗之也嘏長也大也尸陳也毛血告幽全之物也
告幽全之物者貴純之道也血祭盛氣也祭肺肝心貴
氣主也祭黍稷加肺祭齊加明水報陰也取脾腎燔燎
升首報陽也明水泔齊貴新也凡泔新之也其謂之明

水也由主人之潔著此水也

此承上而雜釋祭禮之義也倬遠也鄭氏曰索也齊五齊明水取於月者脾膏腸間脂也燔燔之火取於日者沬猶清也沛漉五齊而使之清故云沬齊廟祭求神既無不致其誠矣而一事一物皆有義存焉如祭之有枋枋之為言求神於遠而為倬也正祭之時為尸設所俎所之為言加敬於尸而為敬也人君嘏辭有富是富也者福也升牲首與神坐相直是首也

者直也祝以詔侑於尸而為相欲其饗此饌也尸使
祝致辭於主人而為嘏取其長久也廣大也尸也者
所以事神而陳其象也殺牲先薦毛血血在內是告
其幽毛在外是告其全也所以告幽全之物者貴其
表裏皆善之道也物以血氣生而血由氣滋血祭所
以表其氣之盛也祭用肺肝心三者為氣之所舍貴
氣主也尸當綏祭以黍稷加肺正祭以五齊加明水
所以報陰也取胛骨燔燎與升首所以報陽也設明

水及泔齊貴其新潔也凡泔皆沛澆而新之謂之明水者由主人使之潔淨而明著也陸氏佃曰祭祀所貴者亦曰純與新而已內外如一純也始終如一新也由主人之潔著此水言苟主人不蠲雖取日月之氣不得為明故曰是誠在我者也

君再拜稽首肉袒親割敬之至也敬之至也服也拜服也稽首服之甚也肉袒服之盡也祭稱孝孫孝子以其義稱也稱曾孫某謂國家也祭祀之相主人自致其敬

盡其嘉而無與讓也

此言祭祀之儀文而明其為自盡之意也祭當朝踐時君已鞠躬再拜又稽首至地當饋食時又肉袒親割此敬之至也敬之至者以其心之服順乎親也拜也者服也稽首則服之甚也肉袒則服之盡也祝辭於祖稱孝孫於父稱孝子義起於祭也於曾祖以上稱曾孫某者義起於國家也祭之有相但詔尸威儀侑尸飲食而不復告以讓者以主人自致其誠敬盡

其嘉善而無所與讓也庾氏蔚之曰賓主之禮相告以揖讓之節祭祀之禮則是主人自致其敬盡其善故詔侑尸者不告尸以讓是其無所與讓也案稱曾孫某如周頌祀文王而曰曾孫篤之

腥肆爛臠祭豈知神之所饗也主人自盡其敬而已矣舉斚角詔妥尸古者尸無事則立有事而后坐也尸神象也祝將命也

此亦雜舉祭祀之儀物而釋之也肆讀曰剔治肉也

臄熟也。臠與角皆爵名。妥安坐也。祭禮或進腥體或進解剔或進湯沈或進煮熟所以用是腥肆燂臄而祭者非真知神之果何所享也。主人亦自盡其敬而已矣。祭之必盡物者以此也。尸始即席舉臠角祝告主人拜尸以妥其坐者古立尸而卒祭有飲食之事而后坐故拜以安之也。尸為神象而祝以將命祭之重尸祝者以此也。

縮酌用茅明酌也。醢酒澆于清汁獻澆于醢酒猶明清

與醖酒于舊澤之酒也

此言沛酒之事也縮沛也沛去其滓也酌斟酌謂行酒也明酌者事酒之上也其色清明故謂之明酌醖酒盎齊也沅亦沛也清謂清酒也獻鄭讀為莎今如字汁獻即鬱齊也汁言其物獻言其事澤讀為醖舊醖之酒謂昔酒也醴齊乃酒之濁者必沛之而後可酌故用茅承藉而沛之先用明酌以和之也醖酒差清欲沛之則先和以清酒不用茅也汁獻有香氣欲

沛之則先和以醖酒不用明酌也夫齊鬯不同所和
亦異皆沛酒之法當然若今時明酌清酒與醖酒沛
之以舊醖之酒也蓋三酒之沛乃古者天子諸侯之
禮因後世已不能知故就所知而曉之如此

祭有祈焉有報焉有由辟焉

此言祭禮之大凡也由用也辟除也鄭注辟讀為弭
先王制為祭禮有求於神而祈焉有答於神而報焉
有禱於神而由辟焉皆所以為民也方氏慤曰祈者

若噫嘻祈穀於上帝載芟之祈社稷是也報者若豐
年之秋冬報良耜之秋報社稷是也辟者若月令之
礫攘開冰而用桃弧棘矢以辟去不祥之類是也

齊之玄也以陰幽思也故君子三日齊必見其所祭者
此言齊用玄服之義也將祭而齊衣冠皆用玄者所
以致其陰幽之思也蓋鬼神為陰幽之義而玄為陰
幽之色惟思之至而鬼神將通之故君子三日致
齊必見其所祭者陸氏佃曰此篇始言貴誠之意故

以齊終也

日講禮記解義卷二十九

謹案卷二十八第十五頁後一行今乃於市内西
方刊本西訛亞今改





覆校官編修臣方燁

校對官檢討臣郭寅

謄錄監生臣費雲開

欽定四庫全書會要

經部

日講禮記解義卷

三十三
三十二

詳校官編修臣程嘉謨





欽定四庫全書薈要卷二千三百二十八

經部

日講禮記解義卷三十

內則

則法也疏謂閨門之內軌儀可則故名朱子曰此古
學校教民之書蓋古經也

后王命冢宰降德于衆兆民

此言內則之所由始蓋一篇之綱也后王謂天子降
下也冢宰六卿之長德謂德教推所得以為教也萬

億曰兆后王繼天立極作君作師既能脩身齊家端其則於上矣乃命冢宰降德教於衆兆民俾皆儆而法之焉案教民雖司徒之分職而冢宰無所不統降德云者教化本於躬行也

子事父母雞初鳴咸盥漱櫛縱笄總拂髦冠綏纓端韞紳搢笏

此言子事父母當夙興而具冠服也盥洗手漱滌口櫛梳也縱以黑繒韞髮作髻也笄橫插之以固髻也

總亦以緡束髮本而垂餘於髻後為飾也髦用髮為之象幼時翦髮為髻形也拂振塵也纓者結於項下以固冠綏者其餘之下垂者也端玄端服韠蔽膝也以韋為之紳大帶之垂者搢插也德莫先於孝子之事父母也當雞初鳴皆盥手漱口遂櫛理其髮以緡韠髮作髻固之以笄而以總束之然後拂去髦上之塵著冠而垂其綏結其纓被服玄端著韠垂紳而插笏於帶中蓋夙興脩潔以自謹其冠服者如此

左右佩用左佩紛悅刀礪小觶金燧右佩玦捍管帶大觶木燧偃屨著綦

此言人子之所佩及足飾也紛悅皆巾名礪礪石也觶狀如錐象骨為之玦著於右手大指以鈎弦而開弓體也捍亦名拾韜左臂而收拾衣袖以利弦也管謂筆彊帶刀室也偃邪幅也纏足至膝以自偃束者亦謂之行縢屨鞋也著猶施也綦鞋口帶也人子冠服既具而身之左右又當佩物以備尊者使令之用

左之所佩者六拭器有紛拭手有悅割物有刀礮刀
有礪解小結有小觶晴而取火於日中有金燧右之
所佩者六開弓有玦韞臂有捍貯筆有管納刀有帶
解大結有大觶陰而鑽火於木中有木燧蓋物之小
者佩於左大者佩於右以右之用力便也又以帛幅
邪纏而徧束其脛於是納屨而施綦以旋繫之則可
以慎步趨而效奔走矣案君子無故玉不去身此言
佩綦詳而不及王者方氏慤曰左右皆事佩也故言

用與德佩異矣

婦事舅姑如事父母雞初鳴咸盥漱櫛縱笄總衣紳左
佩紛悅刀礪小觶金燧右佩箴管線纁施繫袞大觶木
燧衿纓綦屨

此言婦事舅姑者之服佩也夫之父曰舅母曰姑笄
亦名簪衣紳玄端綃衣之上加紳帶士妻服也箴管
箴在管中線纁纁也繫小囊也袞刺也以針刺袞
而為繫囊所以貯箴管線纁者衿猶結也纓以佩容

臭綦屨以綦約屨也婦所以佐夫故事舅姑一如事

父母當雞初鳴亦咸盥漱櫛縱笄總而於衣之上加以紳帶左之所佩者亦為紛帨刀礪小觶金燧右之所佩者則為箴管線纁而施以繁褰餘亦為大觶木燧其衿纓則異而綦屨則同婦之謹其服佩者又如此案古者男婦之笄皆有二其短者所以固髻此經笄總是也其長者男子以固冠士冠禮爵弁笄皮弁笄是也婦人以固被詩副笄六珈是也

以適父母舅姑之所及所下氣怡聲問衣燠寒疾痛苛
癢而敬抑搔之出入則或先或後而敬扶持之進盥少
者奉槃長者奉水請沃盥盥卒授巾問所欲而敬進之
柔色以溫之醴醢酒醴芼羹菽麥黃稻黍粱秫唯所欲
棗栗飴蜜以甘之葷苴粉榆兔薨將瀝以滑之脂膏以
膏之父母舅姑必嘗之而后退

此言子婦問安視膳之禮也苛疥也奉水者水在器
奉以實於槃也溫承藉也謂以和順之色承藉尊者

之意若藻藉之承玉然饘厚粥酏薄粥芼羹以菜雜肉為羹蕒大麻子秬黏稷也飴飴也堇菜名苳似堇而葉大粉似榆而色白免新鮮者薨乾陳者堇苳粉榆四物或用新或用舊也米泔曰滌滌滑曰瀝凝者為脂釋者為膏甘之滑之膏之皆謂調和飲食之味也子婦之服佩既具於是同適父母舅姑之寢室既至則低下其氣怡悅其聲問衣之燠則減之寒則加之有疾痛與苛癢則敬抑按而搔摩之出入則或導

於先或隨於後而敬扶持之進盟則少者奉槃長者奉水而請注水以盥盥卒則授巾問所欲食者而敬進之更和柔其色以承之如醴醢酒醴芻羹菽麥黃稻黍粱秫唯尊者之所欲又用棗栗飴蜜以甘之堇荳粉榆兔薨滫瀡以滑之脂膏以膏之必也父母舅姑既嘗之而後敢退蓋唯恐不得其欲也陳氏澔曰此篇所記飲食珍羞諸物古今異制風土異宜不能盡曉然亦可見古人察物之精用物之詳也

男女未冠笄者雞初鳴咸盥漱櫛縱拂髦總角衿纓皆
佩容臭昧爽而朝問何食飲矣若已食則退若未食則
佐長者視具

此言未冠笄者事親之禮也容臭香物可助為容飾
者佩之恐穢氣觸尊者也昧晦爽明也謂欲明未明
之時凡男未冠女未笄者於雞初鳴咸盥漱櫛縱拂
髦而總髮為角施衿纓佩容臭及昧爽而朝問於親
曰何食飲矣若已食則退未食則助長者視膳具不

敢即退也黃氏曰此言男女少者事父母之禮雖視長者為略然其意亦已至矣

凡內外雞初鳴咸盥漱衣服斂枕簟灑掃室堂及庭布席各從其事孺子蚤寢晏起唯所欲食無時

此言一家之中侍奉尊者之禮也灑掃灑水斂塵而掃去之也凡一家內外如僕妾之屬於雞初鳴咸盥漱衣服斂尊者之枕簟灑掃其室自堂及庭設席以待行事各務其所當為而無敢懈者唯孺子則蚤寢

晏起隨其所欲食無時焉以弱而未勝節制優養之亦以體親志也

由命士以上父子皆異宮昧爽而朝慈以旨甘日出而退各從其事日入而夕慈以旨甘

此言貴者事親之禮也朝見曰朝夕見曰夕慈愛也以甘旨之味致其愛親之意也由命士以上公卿大夫之屬父子雖同居而皆異宮以崇敬也當其昧爽而朝則慈以旨甘日出而退各治其事日入而夕又

慈以旨甘蓋貴者之為養使無旨甘以達其慈則曷
異於無祿也程子曰異室猶今有逐位非如異居也
張子曰古者有東宮西宮南宮北宮異宮而同財此
禮亦可行古人慮遠目下雖似相疏其實如此乃能
久相親蓋命士以上祿厚而人衆勢不能以齊一所
謂以異而得同者此也

父母舅姑將坐奉席請何鄉將社長者奉席請何趾少
者執牀與坐御者舉几斂席與簞縣衾篋枕斂簞而襴

之

此言侍奉尊者卧起之禮也坐席曰坐卧席曰衽將坐奉席亦長者奉之也牀謂安坐之牀几所憑以為安者父母舅姑將坐則先奉坐席而鋪必請問面向何方將卧則長者奉卧席而鋪必請問足向何趾卧而起則少者執牀以與之坐御者舉几以與之憑而於席與簟則收斂之衾則束而縣之枕則以篋貯之簟則既斂而又以襦韜之蓋坐寢唯時少長有禮無

不敬也案鄭注將社謂更卧處則將坐亦非常坐也
若居主奧則東向寢恒東首則西趾不待請也

父母舅姑之衣衾簟席枕几不傳杖屨祇敬之勿敢近
敦牟卮匱非餽莫敢用與恒食飲非餽莫之敢飲食

此言子婦於尊者之所服用飲食而致其謹也傳移
也近偏也敦牟皆盛黍稷之器卮酒器匱以盛水為
沃盥之器與猶及也子婦於父母舅姑之衣衾簟席
枕几置之有常處不得輕為移置杖屨為服御所重

則祇敬之而勿敢偏近數年厄匪非餽其餘莫敢擅
用及常所食飲非餽其餘莫敢擅為飲食凡所以養
其孝心者如此

父母在朝夕恒食子婦佐餽既食恒餽父沒母存冢子
御食羣子婦佐餽如初旨甘柔滑孺子餽

此言子婦餽餘之禮也佐勸食也既盡也父母俱在
朝夕恒食子婦必勸勉而後餽其餘然所盡食者亦
唯恒餽而旨甘柔滑不與焉若父沒母存冢子侍食

羣子婦皆佐餽如父在之時旨甘柔滑則孺子餽案
婦人無專制既嫁從夫故共牢而食夫死從子故長
子御食也

在父母舅姑之所有命之應唯敬對進退周旋慎齊升
降出入揖遊不敢噦噫噍咳欠伸跛倚睇視不敢唾涕
寒不敢襲癢不敢搔不有敬事不敢袒裼不涉不掘褻
衣衾不見裏

此言子婦在尊者之前敬畏之法也唯應之速也舉

手為容曰揖舉足行步曰遊噦嘔逆聲噫所謂噫氣
噫歔噫咳嗽聲欠伸見曲禮跛倚見禮器傾視曰睇
口出曰唾鼻出曰洩敬事如習射之類擗揭衣也子
婦在父母舅姑之所如有命則應之以唯而敬以為
對進退周旋必謹慎齊莊凡升降出入揖遊不敢以
噦噫噫咳與夫欠伸跛倚睇視亦不敢以唾洩雖寒
不敢襲雖癢不敢搔不有敬事雖勞倦不敢袒裼不
因涉水雖當暑不敢揭衣近身之衣衾不敢見其裏

此無一非敬身之事即無一非敬親之事禮所為必
謹於纖悉也

父母唾洩不見冠帶垢和灰請漱衣裳垢和灰請澣衣
裳綻裂紉箴請補綴五日則燂湯請浴三日具沐其閒
面垢燂潘請澣足垢燂湯請洗少事長賤事貴共帥時
此言及尊者之漱澣沐浴而并明少與賤者之禮也
綻猶解也以線貫箴為紉燂溫也潘泔米汁也洗身
曰浴洗頭曰沐洗面曰澣帥循時是也人子於親前

唾洩固所不敢至為父母之唾洩則又刷去之而不
使見以其為人情所不欲見也若冠帶有垢則和灰
湯而請漱衣裳有垢則和灰湯而請澣或衣裳有綻
裂則紉箴請補綴每五日則燂湯請浴三日則具沐
五日三日之間面垢則燂潘請澣足垢則燂湯請洗
凡以致安潔也夫人子之事親既盡其敬又盡其愛
若此少之事長賤之事貴皆當循是禮而行之輔氏
廣曰請澣漱請補綴請則容有不許然必先備灰與

箴而後請敬之至也

男不言內女不言外非祭非喪不相授器其相授則女受以篚其無篚則皆坐奠之而后取之外內不共井不共湑浴不通寢席不通乞假男女不通衣裳內言不出外言不入男子入內不嘯不指夜行以燭無燭則止女子出門必擁蔽其面夜行以燭無燭則止道路男子由右女子由左

此言男女有別之事也坐跪也奠置地也湑浴室也

嘯蹙口出聲也擁障也男正位乎外不當於外而言
內庭之事女正位乎內不當於內而言梱外之事非
祭時之嚴肅喪時之急遽則不相授器或不得已而
相授則女當受之以篚如無篚則男女皆跪俟授者
置諸地而後就地以取之不相親也外與內不共井
而汲不共湑而浴不通坐卧之寢席不通緩急之乞
假男與女不通上下之衣裳內言不出而交於外外
言不入而交於內若男子入內則不嘯不指而聲容

必肅夜行必以燭無燭則寧止女子出門必障蔽其面而不使人窺夜行必以燭無燭則寧止在道路則男子由右女子由左蓋先王制禮節性坊淫而尤嚴於男女之辨凡以肅倫紀而端風化莫有切於此也子婦孝者敬者父母舅姑之命勿逆勿怠若飲食之雖不者必嘗而待加之衣服雖不欲必服而待加之事人代之已雖弗欲姑與之而姑使之而后復之

此言子婦當篤於孝敬也使猶教也子之孝敬者父

母必愛之婦之孝敬者舅姑必愛之然不可恃愛而
生慢也必於父母舅姑之命勿逆勿怠而謹承焉如
飲食之雖非所嗜必嘗以待命加之衣服雖非所欲
必服以待命任之以事而又使人代為己雖不欲姑
且與之慮其為之不善則且教之果不能而后已復
為焉可也夫委曲以將其孝敬若此此勿逆勿怠之
實矣

子婦有勤勞之事雖甚愛之姑縱之而寧數休之子婦

未孝未敬勿庸疾怨姑教之若不可教而后怒之不可怒子放婦出而不表禮焉

此言父母舅姑慈愛之道也庸用也疾惡也怒譴責也表猶明也子婦若有勤勞之事雖甚愛之不可以愛故而勿勞也且縱使為之而寧數休息之若子婦未孝未敬亦勿用驟加疾怨且委曲教之必不可教而后怒以懲誡之至於怒而不改則放其子出其婦不為過矣然猶為之回護而不明禮以著其罪者示

不終絕也案不表禮一說以不表著放出之禮而言如告之宗廟告之族黨鄰里而曰是不足以承家則子婦無自新之路矣不如是者尚冀其悔而可復也父母有過下氣怡色柔聲以諫諫若不入起敬起孝說則復諫不說與其得罪於鄉黨州閭寧孰諫父母怒不說而撻之流血不敢疾怨起敬起孝

此言人子諫親之禮也起猶更也孰諫純熟殷勤而諫也人子於父母固當曲意以順承矣不幸而父母

有過則從命非孝而又有不敢顯諍以招親之失者故必下氣怡色柔聲以諫庶幾婉順不迫可冀父母之我從也如此而不從則起敬起孝以感動之俟其說而復諫不以不入而遂已也若又不說與其畏懼不諫而使父母得罪於鄉黨州閭寧可孰諫而取怒於父母此即怒而至於撻之流血可謂勞矣然終不敢疾怨益起敬起孝以感動之而始終欲喻親於道也

父母有婢子若庶子庶孫甚愛之雖父母沒沒身敬之不衰子有二妾父母愛一人焉子愛一人焉由衣服飲食由執事母敢視父母所愛雖父母沒不衰子甚宜其妻父母不說出子不宜其妻父母曰是善事我子行夫婦之禮焉沒身不衰

此言人子之用情當曲體乎親心也若及也或也由自也視比也宜猶善也出謂出其妻人子當以父母之心為心如父母有婢之所生為婢子及庶母所生

為庶子庶子之所生為庶孫而既甚愛之則子必仰
體親心不唯敬之於父母之存日而已雖父母沒而
必終身敬之不衰如子有二妾父母愛其一子愛其
一自衣服飲食之豐儉自執事之勞逸子之所愛無
一敢以比於父母之所愛者雖父母沒而亦不衰如
子雖甚宜於其妻而或致父母之不說則在所當出
子雖不宜於其妻苟父母而以為善事我則子仍行
夫婦之禮焉而沒身不衰蓋子之身父母之身也子

之心父母之心也於父母之所愛亦愛之至於犬馬
盡然而況於人乎自非知有親而不知有己者未足
與於此也

父母雖沒將為善思貽父母令名必果將為不善思貽
父母羞辱必不果

此言人子成親之善也子以誠身為孝行己之善否
吾親之榮辱關焉不可以父母既沒而不思也如將
為善而未果誠思由我之善而得貽父母以令名必

有斷然而為之者矣將為不善而未果誠思由我之不善而至貽父母以羞辱必有斷然而不為者矣易曰有子考无咎詩曰無忝爾所生而曾子亦曰父母既沒當謹行其身不遺父母惡名可謂能終矣皆此意也

舅沒則姑老冢婦所祭祀賓客每事必請於姑介婦請於冢婦舅姑使冢婦毋怠不友無禮於介婦舅姑若使介婦毋敢敵耦於冢婦不敢並行不敢並命不敢並坐

此言冢婦及介婦之禮也老謂傳家事於長婦也每
事祭祀賓客中之條件也介婦衆婦也王氏曰友當
作敢項氏安世曰友如字怠也不友也無禮也皆以
毋字統之不友謂煩虐之無禮謂麾叱之命使令也
子治外而婦治內故舅既沒則夫死從子姑老而傳
家事於冢婦矣如有祭祀賓客之大禮冢婦仍必請
命於姑介婦則請於冢婦舅姑若使冢婦當服勤毋
怠不敢恃長而不友無禮於介婦舅姑若使介婦當

自任其勞毋敢忘分而欲敵耦於冢婦隨行而不敢
並行請命而不敢並命降坐而不敢並坐如此則娣
姒之際誼正情和一如兄友弟恭之各盡其分也將
所以順乎親者必由於是矣

凡婦不命適私室不敢退婦將有事大小必請於舅姑
子婦無私貨無私畜無私器不敢私假不敢私與

此言婦之不敢自專而又合子婦以明其無私也凡
婦通冢婦介婦而言私室婦室也有事私事也凡為

婦者侍舅姑之側若不命其歸私室則不敢自退將有所事無論大小必請命而後行蓋家事統於一尊故子婦無私藏之貨財無私養之牲畜無私置之器物不敢私為借貸不敢私為饋遺以明有統也

婦或賜之飲食衣服布帛佩帨茝蘭則受而獻諸舅姑舅姑受之則喜如新受賜若反賜之則辭不得命如更受賜藏以待之婦若有私親兄弟將與之則必復請其故賜而后與之

此言婦於私親不敢私受而私與也佩雜佩如箴線之類茝蘭皆香草新猶初也故賜即鄉所藏者或平日舅姑所賜也婦或有私親兄弟賜之以飲食衣服布帛與夫佩悅茝蘭則雖受而亦不敢私必以獻於舅姑舅姑若受之則喜如初受賜者然或不受而反以賜之則辭辭不見許則如更受賜者然猶不敢自用必藏以待舅姑之空乏而復獻之婦若將與私親兄弟亦必復請其故賜待舅姑有命而後敢與之

方氏慤曰獻諸舅姑者不敢私受故也請其故賜而後與者不敢私與故也

適子庶子祇事宗子宗婦雖貴富不敢以貴富入宗子之家雖衆車徒舍於外以寡約入子弟猶歸器衣服裘衾車馬則必獻其上而后敢服用其次也若非所獻則不敢以入於宗子之門不敢以貴富加於父兄宗族若富則具二牲獻其賢者於宗子夫婦皆齊而宗敬焉終事而后敢私祭

此言敬大宗之禮也適子謂父與祖之適子是小宗也庶子謂適子之弟宗子謂大宗子猶若也歸猶賜也賢善也古者大宗百世不遷族之適子庶子皆宜敬事宗子宗婦雖仕而貴且富亦不敢以貴富入宗子之家車徒雖衆必止於門外而以寡約入若有功德受君器用衣服裘衾車馬之賜必獻其上等者於宗子而自服用其次者若非宗子所當用而不可獻則已亦不敢服用以入宗子之門所以然者凡於父

兄宗族皆不敢以貴富加之況所祇事之宗子乎若
富而有祿則每祭必具二牲擇其善者以獻於宗子
宗子祭時小宗夫婦皆齊戒往助而致其尊敬既終
事而後敢以下牲私祭其祖禰焉案詩曰君之宗之
荀卿曰大夫士有常宗是故宗以收族而民不散其
有益於治道也大矣

日講禮記解義卷三十

欽定四庫全書薈要卷二千三百二十九

經部

日講禮記解義卷三十一

內則

飯黍稷稻粱白黍黃粱稭稊

此言諸飯之品也黍粱有黃白二種下云白黍則上黍是黃黍也下云黃粱則上粱是白粱也稊是歛縮之名以生穫故其物歛縮也人子以飲食為奉養其制不可以不悉飯者食之本也其品凡六曰黍曰稷

曰稻曰梁黍梁別有二色曰白黍曰黃梁數者既熟而穫之則曰稭方生而穫之則曰稊而其可以為飯則一也孔氏曰此據諸侯之飯禮而言案玉藻諸侯朔食四簋黍稷稻梁天子乃加以麥苽而為六

膳腳臠臠醢牛炙醢牛臠醢牛膾羊炙羊臠醢豕炙醢豕臠芥醬魚膾雉兔鶉鷄

此言諸膳之品也具食曰膳腳為牛臠臠為羊臠臠為豕臠首一醢字衍炙肉曰炙肉之小者切肉曰臠

肉之大者醢肉醬膾腥肉也膳以佐飯其品凡二十
曰膾曰臠曰臠曰牛炙此四豆為第一行曰醢曰牛
臠曰醢曰牛膾此四豆為第二行曰羊炙曰羊臠曰
醢曰豕炙此四豆為第三行曰醢曰豕臠曰豕醬曰
魚膾此四豆為第四行共十六豆下大夫之禮也曰
雉曰兔曰鶉曰鷄此四豆為第五行並前共二十豆
則上大夫之禮也案公食大夫禮第一行四物最在
於北陳之從西為始第二行四物從東為始第三行

從西為始第四行從東為始上大夫所加雉兔鶉鷄
為第五行陳之又從西為始

飲重醴稻醴清糟黍醴清糟梁醴清糟或以酏為醴黍
酏漿水醴濫

此言諸飲之品也重兼也酏粥也飲之品凡六一曰
重醴以清糟相配而兼設之清是醴之已泝者糟是
醴之未泝者或以稻為醴或以黍為醴或以梁為醴
而皆清糟並設此之謂重醴也一曰酏醴以黍為粥

釀粥而為醴也一曰漿醋水也一曰水煮醪為之味
薄而淡者也一曰醢梅漿也一曰濫以糗飯之屬和
水也案此即周禮漿人之六飲六飲一曰水二曰漿
三曰醴重醴也四曰涼濫也五曰醫醢也六曰醪黍
醪也有清有糟諸侯之禮天子專用清大夫以下用
糟

酒清白羞糗餌粉醪

此言酒與諸羞之品也醪當作飡飲有六而莫重於

酒酒之品二曰清祭祀所用之清酒是也曰白有事而飲之事酒無事而飲之昔酒其色皆白者是也有酒又有羞羞之品四曰糗炒乾米麥也曰餌以水漉糗而合蒸之也曰粉豆屑也曰飡炊稻米為餅而糝豆粉於其上也案周禮羞籩之實糗餌粉飡此蓋用以醢尸者

食蝸醢而菰食雉羹麥食脯羹雞羹折稌犬羹兔羹和糝不蓼

此言進飯之各有所宜也食飯也蝸與螺同苽雕胡
即今之苽米也脯羹析脯為羹也稌稻也折稌細折
稻米為飯也蓼辛菜也諸侯燕食之禮有食以為主
即有羹以為輔而其味貴於相宜如以蝸醢進苽飯
則用雉羹進麥飯則用脯羹雞羹進折稌之飯則用
犬羹兔羹飯之品三羹之品五此五羹各以五味調
和以米屑為糝不須加蓼而分其氣也案蝸醢者醬
也乃食之主無時而不用故五羹俱承蝸醢而言

濡豚包苦實蓼濡雞醢醬實蓼濡魚卵醬實蓼濡鼈醢
醬實蓼

此言烹調之法也濡讀曰脰謂烹煮之而以汁和也
苦苦荼也卵讀曰鯢魚子也卵醬以魚子為醬也五
羹皆不蓼而物又有宜蓼者如脰豚則包裹之以苦
菜而於腹中實蓼脰雞則加醢醬而實蓼脰魚則加
卵醬而實蓼鼈則加醢醬而實蓼蓋藉以制其氣
之過或補其不及也

股脩蚘醢脯羹兔醢麋膚魚醢魚膾芥醬麋腥醢醬桃
諸梅諸卵鹽

此言配食之法也股脩捶脯施薑桂也蚘蚘蜉子也
膚切肉也麋腥生麋肉也諸菹也桃梅皆為菹藏之
欲藏必令稍乾故周禮謂之乾蓀卵鹽謂大鹽形如
鳥卵者食股脩者以蚘醢配之食脯羹者以兔醢配
之食麋膚者以魚醢配之食魚膾者以芥醬配之食
麋腥者以醢醬配之食桃諸梅諸者以卵鹽配之惟

其性味之宜也自蝸醢至此凡二十有六物皆君燕
所食吳氏澄曰麋腥之下醢醬皇氏分醢與醬為二
物今案醢醬釋醢以為醬即肉醬也與卵醬芥醬為
類謂二物者非

凡食齊視春時羹齊視夏時醬齊視秋時飲齊視冬時
此言四時食齊之法也食齊黍稷粱之類羹齊雉
兔雞犬之類醬齊醢醢醢之類飲齊水漿醴涼之
類齊劑同視比也人身通乎天地故善養生者必準

以四時如食以養形宜於溫春則陽中而氣溫故四時之食齊皆視春時也羹以養精宜於熱夏則陽盛而氣熱故四時之羹齊皆視夏時也醬以養脈宜於涼秋則陰中而氣涼故四時之醬齊皆視秋時也飲以養陽宜於寒冬則陰盛而氣寒故四時之飲齊皆視冬時也

凡和春多酸夏多苦秋多辛冬多鹹調以滑甘

此言四時調和之法也凡滋味之和於春多酸助木

以養肝於夏多苦助火以養心於秋多辛助金以養肺於冬多鹹助水以養腎惟土味沖和故皆調以滑甘以養其脾也黃氏裳曰春多酸收發散也夏多苦堅解緩也秋多辛散收斂也冬多鹹軟堅栗也四味一多慮其不通焉滑所以調之慮其不和焉甘所以調之也此與經方春不食酸夏不食苦之類異者彼為少壯言故減其時味以殺盛氣此則以養老而宜於補病扶衰者言也

牛宜稌羊宜黍豕宜稷犬宜粱雁宜麥魚宜菰

此言食膳之各有所宜也牛宜於稌飯羊宜於黍飯
豕宜於稷飯犬宜於粱飯雁宜於麥飯魚宜於菰飯
以其氣味相成也此與上折稌犬羹兔羹麥食脯羹
異者孔疏謂上是人君燕食以滋味為美此據尊者
正食也

春宜羔豚膳膏臠夏宜牯鰯膳膏臊秋宜犢麋膳膏腥
冬宜鮮羽膳膏膾

此言四時煎和膳食之法也。羔豚羊豕之小者，腊乾雉、鱠乾魚、犢小牛、麋鹿子、鮮生魚、羽雁也。春為物生之初，以羊豕之小者為宜而煎以牛膏之鄉；夏為物盛之候，以雉魚之乾者為宜而煎以犬膏之臊；秋則時斂而物成，以犢麋之充遂者為宜而煎以雞膏之腥；冬則時退而物藏，以魚雁之靜息者為宜而煎以羊膏之羶。蓋因四時氣盛故以休廢者節之，與上文春多酸云云各為一義。

牛脩鹿脯田豕脯麋脯麇脯鹿田豕麇皆有軒雉兔
皆有芼爵鸚蜩范芝栢菱棋棗栗榛柿瓜桃李梅杏楂
梨薑桂

此言人君燕食所加之庶羞也脩股脩也析肉乾之
曰脯藿葉切曰軒菜和曰芼麋鹿以下皆有軒獨不
及牛者以牛唯可細切為膾不宜大切為軒也爵與
雀同蜩蟬也范蜂蜜也芝栢一物或曰栢栗屬菱芰
也棋梨屬楂即今山查也人君正羞之外又有所加

之庶羞焉獸之屬凡十禽之屬凡三牛脩一鹿脯一
田豕脯一麋脯一麇脯一麋鹿田豕麇又皆有軒雉
一兔一皆有芼餘為爵一鶚一昆蟲之屬凡二蜩一
范一果之屬凡十四芝栢一棧一棋一棗一栗一榛
一柿一瓜一桃一李一梅一杏一楂一梨一調和之
草木二薑一桂一共三十有一物周禮王之膳羞用
百二十品蓋皆此類此章所記多君大夫之禮雖非
士庶所得備然有可通用者則儲之以為養老之資

固子婦所以盡其孝敬也

大夫燕食有膾無脯有脯無膾士不貳羹馘庶人耆老不徒食

此言大夫以下燕食之法也燕食燕居之食徒空也燕食之禮大夫有膾則無脯有脯則無膾士於羹馘不得兼設示其節也唯庶人耆老則食必有肉而無所差殊所以優老也

膾春用蔥秋用芥豚春用韭秋用蓼脂用蔥膏用薤三

牲用穀和用醯獸用梅

此言用物調和之宜也芥即芥醬三牲牛羊豕也穀菜蕒也用穀若醯以和三牲用梅以和獸凡調和之物用各有宜以膾而言春用蔥秋用芥以豚而言春用韭秋用蓼和脂用蔥和膏用薤三牲體大而不能無薑則用穀其和三牲則用醯和羣獸則用梅因時因物而殊用若此蔥之氣達韭之氣溫故宜春芥蓼性辛故宜秋脂之用蔥膏之用薤春夏無分焉

鵲羹雞羹鴛鵲釀之蓼魴鱖炆雞燒雉鄉無蓼

此言禽魚調和之法也鴛鵲也釀切雞和之也鄉謂香草若蘇荏之屬鵲可為羹雞可為羹鴛則不為羹而可以炆煮三者皆切蓼以雞和之魴鱖乃魚之弱者則用炆雞乃鳥之小者則用燒雉則或燒或炆或以為羹皆以鄉草和之而無所用蓼也陸氏佃曰無蓼與不蓼異不蓼不必用蓼耳無蓼直無蓼也

不食雞鼈狼去腸狗去腎狸去正脊兔去尻狐去首豚

去腦魚去乙鼈去醜

此言物之不利於人者不食也。雖鼈鼈伏乳者尻臍也。脊梁盡處乙舊謂魚目旁有骨如篆乙之形能鯁人者據爾雅魚腸謂之乙其形屈曲如乙字也。醜鼈竅也物之可以養人者有利亦或有害如介屬有鼈而雖者不食狼則去腸狗則去腎狸則去正脊兔則去尻狐則去首豚則去腦魚則去乙鼈則去醜去所當去而不概為食所以衛生而不至於傷生也。

肉曰脫之魚曰作之棗曰新之栗曰撰之桃曰膽之粗
梨曰攢之

此言諸物治擇之名也脫脫骨作削鱗也新拭之使
新也撰選擇也膽拭去其毛使光滑如膽也攢攢看
其蟲孔也動植之物可食者治擇亦有法焉肉須去
骨則曰脫之魚須削鱗則曰作之棗有塵則曰新之
栗有蟲則曰撰之桃有毛則曰膽之粗梨有蠹則曰
攢之案爾雅瓜曰華之桃曰膽之棗李曰寔之楂梨

曰鑽之儀禮棗炰棗擇皆與此小異

牛夜鳴則廋羊泠毛而毳羶狗赤股而躁臊鳥鵲色而沙鳴鬱豕望視而交睫腥馬黑脊而般臂漏

此言物之反常者不可食也廋臭如朽木也泠稀也
毳結也鵲色變而無潤澤也沙嘶也沙鳴謂鳴而其
聲沙嘶者鬱腐臭也腥讀為星肉中生小息肉如米
也般臂前脰毛斑也漏當依周禮作螻物之可食者
或反其常則不可以無辨牛勞於晝而息於夜若當

夜而鳴則其肉必腐羊毛本稀冷若毛端毳結則其肉必羶狗若股裏無毛而舉動狂躁則其肉必臊鳥若毛羽悴而不澤聲音嘶而悲酸者則其肉必鬱豕若昂首上視睫毛相交而生則其肉必腥馬若脊毛獨黑而臂毛有文則其肉必臭如螻蛄是皆不可食也案此與周禮內饗職文同

雞尾不盈握弗食舒雁翠鵠鵝胖舒鳧翠雞肝雁腎鵠
臭鹿胃

此廣言不可食之物也。雛，小鳥。握手，一握也。舒雁，鵞也。翠尾肉也。鵠，鵠二鳥名。胖脇，側薄肉也。舒鳧，鴨也。鵞類於雁，鴨類於鳧，皆為人所畜，不能疾飛，故曰舒雁。舒鳧也。鵞似雁而大，無後趾，與脾肱也，藏於深奧之處，故曰奧雛。本小鳥，若尾不盈握，則其形未成，而不可食。他若舒雁之翠鵠，與鵞之胖舒鳧之翠雞之肝雁之腎鵞之奧鹿之胃，亦皆所宜去也。案舒雁翠以下不言弗食者，蒙上為義。

肉腥細者為膾大者為軒或曰麋鹿魚為菹麋為辟雞
野豕為軒兔為宛脾切蔥若薤實諸醢以柔之

此言諸食之制也辟雞宛脾皆菹類凡肉腥細縷切
者為膾大片切者為軒或又謂牲體大者則大切牲
體小者則小切如麋鹿與魚為菹麋為辟雞野豕為
軒兔為宛脾凡此諸食皆用切蔥若薤雜置諸醢中
以柔之蓋肉之方切性尚堅韌浸漬而熟則柔軟矣
羹食自諸侯以下至於庶人無等大夫無秩膳大夫七

十而有閣天子之閣左達五右達五公侯伯於房中五
大夫於閣三士於坵一

此言食禮之有同異也食飯也秩常也閣以板為之
所以度食物者達夾室也以由是而達於外故謂之
達五者三牲之肉及魚腊三者豕魚腊也人之養生
以食為主以羹為配是日用所常食也故自諸侯以
下至於庶人但稱其有無而不預為之等至於膳則
有等矣五十命為大夫未為甚老猶無常膳必待七

十而後有閣乃有常膳也唯天子養以天下體尊物
備故其閣左夾室有五右夾室有五公侯伯則無夾
室而即於一房之中為五閣大夫無嫌亦於夾室為
閣而其數止三士雖七十不得為閣但於房為土玷
以度食也張氏怡曰上言大夫士燕食有無以肉食
言此言無等以羹食二者言也崔氏靈恩曰宮室之
制中央為正室左右為房房外有序序外有夾室

凡養老有虞氏以燕禮夏后氏以饗禮殷人以食禮周

人脩而兼用之凡五十養於鄉六十養於國七十養於學達於諸侯八十拜君命一坐再至瞽亦如之九十者使人受五十異糧六十宿肉七十貳膳八十常珍九十飲食不違寢膳飲從於遊可也六十歲制七十時制八十月制九十日脩唯絞紵衾冒死而后制五十始哀六十非肉不飽七十非帛不煖八十非人不煖九十雖得人不煖矣五十杖於家六十杖於鄉七十杖於國八十杖於朝九十者天子欲有問焉則就其室以珍從七十

不俟朝八十月告存九十日有秩五十不從力政六十
不與服戎七十不與賓客之事八十齊喪之事弗及也
五十而爵六十不親學七十致政凡自七十以上唯哀
麻為喪凡三王養老皆引年八十者一子不從政九十
者其家不從政瞽亦如之凡父母在子雖老不坐有虞
氏養國老於上庠養庶老於下庠夏后氏養國老於東
序養庶老於西序殷人養國老於右學養庶老於左學
周人養國老於東膠養庶老於虞庠虞庠在國之西郊

有虞氏皇而祭深衣而養老夏后氏收而祭燕衣而養
老殷人晡而祭縞衣而養老周人冕而祭玄衣而養老
此章自凡父母在子雖老不坐二句外餘並見王制
陸氏佃曰王制主國故先言養國老於上庠後言凡
三王養老皆引年八十者一子不從政內則主家故
先言三王養老皆引年八十者一子不從政後言養
國老於上庠

曾子曰孝子之養老也樂其心不違其志樂其耳目安

其寢處以其飲食忠養之孝子之身終終身也者非終
父母之身終其身也是故父母之所愛亦愛之父母之
所敬亦敬之至於犬馬盡然而況於人乎

此因上陳養老之事遂言孝子養親之禮也老謂父
母也記述曾子之言謂孝子之養老也非徒養口體
而已必也無所事則樂其心有所欲則不違其志怡
色柔聲以樂其耳目昏定晨省以安其寢處更以其
飲食而盡心養之至於孝子之身終而後已焉夫所

謂終身也者非終竟父母之身乃直以終其身也是故父母雖沒而於所愛亦愛之於所敬亦敬之必沒身而不哀此即至於犬馬盡然而況父母所愛敬之人乎案養乃生事之禮而必終孝子之身者所謂大孝終身慕父母也

凡養老五帝憲三王有乞言五帝憲養氣體而不乞言有善則記之為惇史三王亦憲既養老而后乞言亦微其禮皆有惇史

此言五帝三王養老之禮也憲法乞求也惇史記惇厚之德以為史也微其禮者從容求之不敢逼迫也古之養老也在五帝則主於法其德行三王兼又有乞言之禮蓋五帝之時風氣初開但朝夕於老者以法其德奉養其氣息身體而不敢屑屑以乞言有善則記錄之以為惇厚之史使衆人法則而已三王之時人文漸著雖亦未嘗不法其德但於既養之後又必乞言以為淑躬善世之資然其乞言也亦微約其

禮而不敢以偪切於老者惇厚之德皆記之以為惇
史與五帝同是則養老之禮雖微有異而其為貴齒
尚德則一也

淳熬煎醢加于陸稻上沃之以膏曰淳熬淳母煎醢加
于黍食上沃之以膏曰淳母

此言淳熬淳母之法也淳即沃也熬即煎也母讀為
模象也象淳熬而為之也養老之典其珍有八詳而
列之有所謂淳熬者先以陸地之稻為飯上加煎醢

又恐味薄更沃之以膏使味相湛漬是沃之以膏為
淳而煎醢即為熬故名之曰淳熬有所謂淳母者先
以黍為飯上加煎醢又沃之以膏黍與稻不同而制
則悉如淳熬之法故名之曰淳母此八珍之一之二
也

炮取豚若將剗之剗之實棗於其腹中編萑以苴之塗
之以謹塗炮之塗皆乾擘之濯手以摩之去其皽為稻
粉糲漚之以為酏以付豚煎諸膏膏必滅之鉅鑊湯以

小鼎鄉脯於其中使其湯毋滅鼎三日三夜毋絕火而
后調之以醢醢

此言炮豚炮牂之法也炮者塗燒之名若及也將讀
為牂牡羊也萑葦之類苴裹也謹讀為瑾黏土也皽
謂皮肉上之魄膜也糴與前章滌澶之滌同酏粥也
付與傳同滅沒也脯解析之薄如脯也鄉脯香美此
脯也珍有所謂炮者取豚及羊剗之剗之去其五藏
而實棗於腹中裹以編葦塗以黏土而燒之俟塗皆

乾以手摩去其乾泥更以水濯手摩去其皸膜於是
用稻米粉滄漉為粥以敷其外而俱煎以膏所用之
膏必以沒之為度以大鑊盛湯以小鼎之香脯置於
湯中而使湯無沒鼎至三日三夜毋絕火而後以醢
與醢調和之此八珍之三之四也

擣珍取牛羊麋鹿麇之肉必舐每物與牛若一捶反側
之去其餌孰出之去其皸柔其肉

此言擣珍之法也舐夾脊肉捶即擣也餌筋腱謂筋

之大者珍有所謂擣珍者取牛羊麋鹿麇五獸之肉
必皆夾脊之美者而以牛為準其四獸之多寡每物
與牛若一反捶之又側捶之去其筋餌既熟取出然
後去膜而柔以醢醢此八珍之五也

漬取牛肉必新殺者薄切之必絕其理湛諸美酒期朝
而食之以醢若醢醢

此言漬肉之法也湛亦漬也期朝周一日也醢梅漿
也珍有所謂漬者專取牛肉牛必新殺者從而薄切

之必橫斷其文理俟漬於美酒之中周一日而後可食則以醢若醢醢為之調和此八珍之六也

為熬捶之去其皽編萑布牛肉馬屑桂與薑以灑諸上而鹽之乾而食之施羊亦如之施麋施鹿施麇皆如牛羊欲濡肉則釋而煎之以醢欲乾肉則捶而食之

此言為熬之法也熬於火上為之即今之火脯也濡濕也釋潤也珍有所謂熬者其法取牛肉生擣之去其皽膜編萑而以肉布馬先屑薑與桂以灑諸上次

用鹽以鹽之待乾而後食之其施設於羊亦如牛法
其施設於麋鹿麋亦如牛羊法或濡或乾唯人所欲
若欲濡則以水潤釋而煎之以醢若欲乾則擣而食
之此八珍之七也

糝取牛羊豕之肉三如一小切之與稻米稻米二肉一
合以為餌煎之

此言糝食之法也作糝者取牛羊豕三獸之肉多寡
如一小切之並取稻米稻米二分肉一分合為餌而

煎之此即周禮醢人所掌糝食乃羞豆之第二也當在章末為酖之下

肝膋取狗肝一幪之以其膋濡炙之舉焦其膋不蓼此言肝膋之法也膋腸間脂也幪覆也舉皆也珍有所謂肝膋者其法取狗肝一即幪之以其膋帶濕而炙之俟濕者皆焦為度而後食不須用蓼此八珍之八也案上言養老而此繼以八珍所謂養老之珍具也至人子事親雖力有不齊而制不可以不審故詳

著之

取稻米舉糲洩之小切狼臄膏以與稻米為醅

此言醅食之法也臄胸臄也醅當作餽蓋醅是粥非
豆實也為醅之法取稻米粉皆洩之小切狼臄
中之膏與粉相合而煎之以為餅此周禮醯人之醅
食乃羞豆之第一也